

दिनांक 26.05.2024

समय: 18.50 बजे

आकाशवाणी जयपुर—अजमेर

प्रादेशिक समाचार

- प्रदेश मांय करड़ी गर्मी अर तेज लू रा असर ऊं जिन्दगी माथे असर— विशेषज्ञां बचाव सारू काढी एडवाइजरी।
- मुख्यमंत्री भजन लाल शर्मा कयो —राज्य सरकार करड़ी गर्मी अर हीटवेव ऊं लोगों ने राहत सारू कर री है सगळा इंतजाम।
- राज्य मांय लोकसभा चुनाव ने देखता न्यारी न्यारी एजेंसियां अजे ताई 1 हजार 205 करोड़ रिप्या री कीमत ऊं बत्ती री गैर कानूनी चीजां अर नकदी जब्त।

अर

- केन्द्र सरकार दूरसंचार सेवा प्रदातावां ने अंतर्राष्ट्रीय फर्जी फोन कॉल रोकण रा दिया निर्देश।

000

प्रदेश मांय करड़ी तपत अर तेज लू रा हालात बण्योडा है। करड़ी गर्मी ऊं जिन्दगी माथे असर पड्यो है अर लोगों रा रोज रा कामां मांय बदलाव देख्यो जावे। आं दिनां बजारां अर गळियां मांय दोपहरां री बगत सन्नाटो पसर्यो रियो। मौसम केन्द्र जयपुर मुजब लारला 24 घंटां मांय जोधपुर, बीकानेर अर कोटा संभाग रा केई ठोडां माथे तेज हीटवेव चाली। वटे ई कुछ ठोडां माथे काले रात मांय गर्म लू चालती री। सब ऊं बत्ती 50 डिग्री सेल्सियस तापमान फळोदी मांय दर्ज व्ह्यो, जो सामान्य ऊं 6 दशमलव 9 डिग्री सेल्सियस बत्ती है। वटे ई काले रात सब ऊं बत्ती 35 डिग्री सेल्सियस कमती रो तापमान बाड़मेर मांय दर्ज करी ज्यो। बाड़मेर मांय 48 दशमलव 8, जैसलमेर मांय 48, बीकानेर मांय 47 दशमलव 2, चूरू मांय 47, फतेहपुर मांय 46 दशमलव 7 डिग्री सेल्सियस बत्ती रो तापमान दर्ज करी ज्यो। वठी ई राजधानी जयपुर मांय पारो 43 दशमलव 8 डिग्री सेल्सियस दर्ज हुआ। जैसलमेर ऊं म्हारा खबरनवीस बतायो के तेज गर्मी अर लू रे बावजूद सरहद रा पहरेदार आपरी जिम्मेदारी पूरी मुश्तैदी से साथे निभा रिया है।

हनुमानगढ़ मांय तेज गर्मी अर लू रो दौर चाले। चिकित्सा महकमा कानी ऊं जिला मांय झाई—डे मनायी ज्यो। ई दौरान महकमा रा कार्मिक मच्छर नियंत्रण सारू लोगों ऊं घरां

मांय रूकी ज्या पाणी ने खत्म करण री अरज करी। सवाईमाधोपुर मांय करडी गर्मी ऊं बचण सारू सरकारी अर गैर सरकारी थर माथे केई जतन कर्या जावे। जैसलमेर जिला मांय तेज गर्मी अर लू सारू चेताया जावण ने ध्यान मांय राखता जिला प्रशासन एडवाइजरी काढी है।

बाड़मेर मांय नगर परिषद कानी ऊं केई ठोडां तम्बू लगायी ज्या है अर पीवण रा पाणी रा बन्दोवस्त करी ज्या है। परिषद कानी ऊं शहर री सड़कां माथे पाणी रो छिड़काव ई कर्यो जावे। उठी ने बांसवाड़ा मांय आखे दिन तपन रे पाछे सिंज्या बादळ छाइजण अर ठण्डी हवा चालण ऊं लोगां ने थोड़ो आराम मिल्यो।

सलूमबर जिला मांय आज दोपहरां पाछे मौसम मांय अचाणचक आया बदलाव रे पछे छांटा छिड़को व्ह्यो। और ब्यौरो म्हारा खबरनवीस ऊं—

मौसम केन्द्र जयपुर मुजब आवता दो दिनां मांय बीकानेर, जयपुर, भरतपुर अर कोटा संभाग रा कुछ ठोडां तापमान मांय 2 डिग्री सेल्सियस ताई बढवार होवण रो अंदाजो है। वठे ई बीकानेर अर जोधपुर संभाग मांय तेज लू रो दौर आवता दो-तीन दिन ताई चालता रेहवण री आस है। केन्द्र काले ऊं तीन दिन रे दौरान जोधपुर, बीकानेर, अजमेर अर जयपुर संभाग मांय आंधी चालण री आस जताई है। खेती महकमो तेज गर्मी ने देखता काशतकारां ऊं जायद अर नरमा कपास री फसलां ने बचावण सारू एडवाइजरी काढी है। कृषि विज्ञान केन्द्र मुर्गी पालकां ने ई गर्मी ने देखता जरूरी बन्दोवस्त ठावा करण री सलाह दी है।

000

मुख्यमंत्री भजन लाल शर्मा कयो है के राज्य सरकार करडी गर्मी अर हीटवेव ऊं लोगां ने आराम पूगावण सारू सगळा बन्दोवस्त तैय कर री है। आज जयपुर रा सेन्ट्रल पार्क मांय खबरनवीसां ऊं बतळ मांय श्री शर्मा कयो के पीवण रा पाणी रा बन्दोवस्त तैय करण रे साथे ही बिजली री बिना कटौती रे सप्लाई सारू सगळा जतन कर्या जा रिया है।

वठे ई राष्ट्रीय आयुर्वेद संस्थान रा डॉक्टर पुनीत चतुर्वेदी लोगां ने तेज गर्मी ऊं एहतियात बरतण री सलाह दी है।

000

विधानसभा रा अहलकारां ने विधायी कामां मांय जाणकारी ताजा करावण सारू काले ऊं सिखावण रो कार्यक्रम सरू व्हे रियो है। इण दो दिन रा सिखावण कार्यक्रम मांय अहलकारां ने विधायी कामां मांय जाणकारी ताजा करावण सारू विषय विशेषज्ञां ऊं मिलाया जाएला। विधानसभा अध्यक्ष वासुदेव देवनानी बतायो के सोलहवीं विधानसभा रा सरू मांय विधायकां ने विधानसभा रा कायदां, विनियमां री जाणकारी देवण सारू प्रबोधन कार्यक्रम करी ज्यो हो।

विधान ऊं जुड्या कामां री जाणकारी करावण, काम रो बूतो बधावण अर आधुनिक सूचना तकनीक ऊं काम करण सारू ओ दो दिन रो सिखावण कार्यक्रम राख्यी ज्यो है।

000

प्रदेश मांय लोकसभा चुनाव ने देखता न्यारी-न्यारी एनफोर्समेंट एजेंसियां मार्च म्हीना री सरूआत ऊं अजे ताई नशीली दवाइयां, शराब, कीमती धातुआं, फ्री-बीज अर गैर कानूनी

नकदी रा रूप मांय 1 हजार 205 करोड़ रूपया कीमत ऊं बत्ती री जब्तियां करी है। मुख्य चुणाव अहलकार प्रवीण गुप्ता बतायो के चुणाव माथे असर रा मकसद ऊं शक वाळी चीजां अर धन रा गैर कानूनी इस्तेमाल माथे न्यारी न्यारी एजेसियां करडी निजर राख्या है। वणा बतायो के आदर्श आचार संहिता लागू होवण रे पछे चुणाव महकमा रा निर्देश माथे 16 मार्च ऊं अजे ताई पकडी ज्यी चीजां री कीमत 1 हजार 100 करोड़ रूपया ऊं बत्ती है। एक मार्च ऊं अजे ताई राज्य रा 12 जिलां मांय 40-40 करोड़ रिप्या ऊं बत्ती री रकम री शक वाळी चीजां अर नकदी जब्त करीजी है।

000

लोकसभा चुनाव री चार जून ने होवण वाळी मतगणना ने लेर प्रदेश रा न्यारा-न्यारा जिलां मांय तियारियां तेज व्हे ग्यी है। दौसा मांय वोटों री गिणती री तियारी सारू समीक्षा मीटिंग व्ही। मतगणना री ठोड पीजी कॉलेज दौसा मांय राख्यी ज्यी ई मीटिंग री सदरत जिला चुणाव अहलकार देवेन्द्र कुमार करी। वणा वोटों री गिणती रा काम ऊं जुड्या प्रकोष्ठ प्रभारी अहलकारां ने सगळी तैयारियां बगतसर पूरी करण रा निर्देश दिया। वणा मतगणना रे दिन पार्किंग, मोबाइल राखण रा बन्दोवस्त अर गर्मी रा मौसम ने ध्यान मांय राखता माकूल बन्दोवस्त करण रा हुकम दिया।

000

केन्द्र सरकार दूरसंचार सेवा प्रदातावां ने अंतर्राष्ट्रीय फर्जी फोन कॉल रोकण रा निर्देश दिया है। संचार मंत्रालय एक पानडी मांय कहयो है के जालसाज भारतीय नागरिकां ने भारतीय मोबाइल फोन नम्बर दिखा र अंतर्राष्ट्रीय फर्जी फोन कॉल कर रिया है। आं फोन कॉल ऊं साइबर अपराध अर रोकड़ धोखाधडी करी जाय री है। दूरसंचार महकमा रे साथे मिलने दूरसंचार सेवा प्रदाता अंतर्राष्ट्रीय फर्जी कॉलां ने पहचाणण अर वां ने किंणी ई भारतीय दूरसंचार ग्राहक ताई पूगण ऊं रोकण मांय मदद करण सारू एक प्रणाली तैयार करी है। दूरसंचार महकमा रा निर्देशां मुजब भारतीय लैडलाइन नंबरों रे साथे आवण वाळी अंतर्राष्ट्रीय फर्जी कॉल ने दूरसंचार सेवा प्रदाता पेला ऊं ई ब्लॉक कर रिया है। मंत्रालय कयो है के अबे दूरसंचार सेवा प्रदाता ने ऐडी अंतर्राष्ट्रीय फर्जी कॉल ने ब्लॉक करण रा हुकम काढी ज्या है।

000

आईपीएल क्रिकेट रा फाइनल मैच मांय आज सनराइजर्स हैदराबाद रो मुकाबलो कोलकाता नाइटराइडर्स रे साथे व्हेला। चेन्नई रा एम.ए. चिदंबरम स्टेडियम मांय खेल्या जावण वाळो ओ मुकाबलो सिज्या साढे सात बज्यां ऊं सरू व्हेला। दोन्यू टीमां रे बीचे अजे ताई खेलेली ज्या 27 मुकाबलां मांय ऊं 18 मांय कोलकाता अर 9 मांय हैदराबाद री टीम जीत हासिल करी है।

000

भ्रष्टाचार निरोधक ब्यूरो-एसीबी रो दळ अलवर रा प्रतापगढ़ मांय आज कार्रवाई करता दो डॉक्टरों अर एक दूजा मिनख ने 25 हजार रिपया री घूस लेवता रंग्या हाथां गिरफ्तार कर्या है। भ्रष्टाचार निरोधक ब्यूरो रा पुलिस महानिदेशक डॉ. रवि प्रकाश मेहरड़ा बतायो के परिवादी री शिकायत ही के थाना प्रतापगढ़ मांय दर्ज मारपीट रा मुकदमा मांय एमएलसी रपट पगस मांय बणावण री ऐवज मांय सामुदायिक स्वास्थ्य केन्द्र रा दो डॉक्टर एक लाख रिप्यां री मांग कर रिया है। ई सूचना माथे एसीबी सत्यापन रे पछे तीनां ने गिरफ्तार कर लीना।

000

केन्द्रीय सड़क परिवहन अर राजमार्ग राज्यमंत्री जनरल वी.के. सिंह आज दौसा रा मेहंदीपुर बालाजी धाम पूरया । ई दौरान वणा पिरवार समेत बालाजी महाराज रा दर्शन अर पूजा अर्चना करी । वणा देश मांय खुशहाली री कामना करी ।

000